

國子監志

卷之二
廟志二
建修

第五冊

國子監志卷二

廟志二

建修

順治八年

世祖章皇帝以武功耆定。文教誕敷。將於明年
視學釋奠。

特諭禮部繕修

聖廟

恭載卷首
諭旨

十四年。以西廡稍圯。



諭工部

文廟崇祀

先師孔子所關典禮甚重。今已年久傾圮。若不速為整理。後漸頽壞。葺治愈難。因爾部錢糧匱乏。所需工料未能措辦。朕發內帑銀三萬兩。特加修葺。爾部即傳諭行。

康熙六年

聖祖仁皇帝將舉

臨雍釋奠大典

諭禮部修

先師廟。俟工成日。諏吉以聞。

恭載卷首 諭旨

十八年修

先師廟西廡及

啓聖祠

四十二年

特發內帑修

先師廟

命和碩理親王董其事。至四十四年告成。

國子監志 卷二 建修
先師神位移奉順天府學

五十二年祭酒徐日暄等奏請修葺廟廡奉

旨交廣善庫動帑辦理

先師神位移奉敬一亭中

雍正元年

世宗憲皇帝纘承丕緒將舉

臨雍釋奠大典

諭禮部

孔子道冠古今為萬世師表薄海內外無不俎豆尊

崇國學乃四方表率其制尤重

聖祖仁皇帝臨雍釋奠典禮優隆朕纘承大統景仰先
型羹牆如見念國學為造士之地聖教所被莫先於
此恐歷歲既久有應加修葺之處爾部會同工部詳
加閱視凡

文廟殿宇廊廡及講堂學舍務須整理周備俾廟貌
聿新以申景慕朕將親詣焉

八年兼管監事果郡王等奏請修葺

先師廟

詔太常寺委員經理

十一年太常寺奏請修葺

先師廟東西廡

詔從之

乾隆二年

高宗純皇帝初登大寶將以明年二月舉

臨雍釋奠大典

特飭太常寺預修

文廟

建修

又

諭禮部

至聖先師孔子天縱聖神師表萬世尊崇之典至我朝而極盛

皇考世宗憲皇帝尊師重道禮敬尤隆闕里

文廟

特命易蓋黃瓦鴻儀炳煥超越前模朕祇紹

先猷羹牆念切思國子監為首善觀瞻之地辟雍規制

宜加崇飾大成門大成殿著用黃瓦崇聖祠著用綠

廟志二

四

瓦以昭展敬至意

高宗純皇帝御製

文廟易蓋黃瓦

臨雍紀事碑文

天生烝民。若有恒性。人道立焉。亶生聰明神聖。作之君。作之師。以厚其生。以正其德。綱常之所以不墜。倫類之所以相維。相保於天地間者。斯焉。是賴古聖皇。繼天立極。君師之道兼隆。夙乎尚矣。繼是以來。雖代有君。而克盡其為君之道。蓋寡。若夫同天地。亘今古。

繼往聖。開來世。特立為師之道於宇宙間者。則惟我先師孔子一人。敬惟

孔子集羣聖之大成。祖述憲章。垂教萬世。使後之帝王。建極綏猷。得有所遵循。以求治法道法之大全。由之則治。悖之則亂。大哉

孔子。功參乎覆載。明竝乎日月。生民以來。未有盛焉者也。我

列祖撫御寰區。敘彝倫。明禮樂。誠民阜俗。一惟孔子所傳之大經大法。是矩是式。微言奧義。悉推闡

而表章之。統緒相承。心源符契。欽敬追崇之盛典。超越往代。具在彝章。予小子懋學書聞。景行志切。逮寅承丕緒。祇奉

先猷。夙夜兢兢。繹思

聖道。越乾隆三年季春上日。躬釋奠於

先師。前期飭官庀材。崇飾廟貌。特命大成殿。大成門。覆以黃瓦。崇聖祠。覆綠瓦。稱朕慕道崇師至意。記曰。禮時為大。宜次之。稱次之。先王之制禮也。順於鬼神。合於人心。惟其稱而已。太學者帝王尊師之地。盡禮

備物以明尊也。稱其德而不為過。宜莫大焉。抑非以炫耳目之觀也。欽崇至道。敷政教以淑羣黎。法

祖隆

師。罔敢或斁。俾薄海內外。無一夫不與被

聖人之澤。斯朕志也。夫乾隆四年己未。用允廷臣之請。勒文紀事。以垂示於奕世。系以詩曰。

於昭道統。淵源三五。

至聖挺生。立極萬古。贊修刑定。為帝王師。天地悠久。斯文在茲。惟我

祖

宗。惇崇典禮。爰謁林廟。爰封祖禰。予膺鴻緒。彝憲是承。釋奠視學。大昕鼓徵。萬仞宮牆。園橋首善。笙鏞斯陳。俎豆斯薦。眈眈翼翼。烏革翬飛。制符宸居。金碧流輝。丕煥宏模。神明所宅。玉振金聲。永揚教澤。式眎兆庶。式育才賢。光宣文治。億萬斯年。

三十二年。

諭內閣太學

文廟前經改用黃瓦。楹桶鼎新。迄今閱年已久。宜重

加丹雘。式煥宮牆。著交現在。派修宮殿工程處。諏日鳩工。敬謹繕葺。用副朕重道右文至意。尋

命大學士忠勇公傅恒等總理其事。

先師神位。移奉彝倫堂中。

高宗純皇帝御製重修

文廟碑記

舉江淮河濟以贊海。吾知其不知海。舉嵩岱恒華以贊地。吾知其不知地。然則舉道德仁義以贊孔子者。其亦類於是乎。夫江淮河濟。豈不為海所納。

而不足以形海之大。然海固不拒江淮河濟以為水也。嵩岱恒華，豈不為地所載而不足以究地之厚。然地固不讓嵩岱恒華以為土也。道德仁義，豈不為孔子所垂而不足以盡孔子之量。然

孔子固不外道德仁義以為教也。教之義始見於虞書。而未有定所。夏校殷序周庠，學則三代共之。是國學所昉乎。夫三代既有學，亦必有教。而吾以為孔子立道德仁義之教者何。蓋三代以前之教非

孔子不明。三代以後之教非

孔子不垂也。國學始於元太祖置

宣聖廟於燕京。由元及明代有損益修葺。至本朝而崇奉規模為大備。

列聖右文臨雍。必事輪奐。乾隆戊午，朕詣學展儀。先詔易蓋黃瓦。聿昭茂典。然丹雘雖致飾壯觀。而上棟下宇。風雨燥濕。歷年既久。浸歛是虞。爰以歲丁亥。發帑二十餘萬。特簡重臣司其事。越己丑仲春。告歲工。朕親釋奠以落成焉。先是言臣有以宜乘此時修復。辟

雍園水之制為請者禮官以為三代之制弗相沿襲實政不必泥古朕以其言良是遂從之門殿諸額一準會典皆親書各懸於其所舉大工者必勒碑以誌故敘其事書之若夫述

孔子之言仍以頌

孔子是猶繪日月星辰以象

天朕有所不能

又

命

先師廟碑亭竝用黃瓦

謹案

大成殿墀

國朝建立碑亭十一座凡

駿烈鴻功勒石太學者竝覆黃瓦其康熙二十五年

聖祖御製

先師孔子贊又二十八年

御製四賢贊雍正六年

世宗御製丁祭詩碑亭三座均用綠瓦至是監臣陸宗

楷等言三亭舊覆綠瓦者皆

聖德淵深。鳴謙協吉。以爾時

文廟尚用綠瓦。不欲特示尊崇也。今自乾隆三年

特命

至聖殿庭改覆黃瓦。

列祖謨典。自應益著輝煌。宜竝用黃瓦。以符體制。

詔從之。

三十三年。

諭內閣修葺

文廟現屆落成。太學規模式昭輪奐。惟門題殿榜尚
應詳考彝章。用肅景仰。向來正殿稱
先師廟。二門曰廟門。而大門未有書額。蓋沿習明代
舊文。未加釐正。夫廟門之號於禮經所稱祖廟。既涉
嫌疑。而

先師廟額。揭諸殿楹。名實尤多未稱。應於大門增
先師廟額。其正殿改為大成殿。二門改為大成門。庶
符會典定制。朕親書榜字。涓吉恭懸。以彰崇道尊
師之至意。

又

諭內閣國學崇祀

先師規制法程美備是飭我

列聖右文重道尊禮有加朕臨御初即詔易黃瓦儀惟其隆邇以殿廡歲久弗葺特發帑金二十餘萬鳩庀鼎新勅大臣董厥成輪奐視舊增益工就告歲而門殿諸額向沿明張璠陋議非所以肅觀瞻明折中也既依會典定名躬為榜書竝宣示釐正大指茲復親製碑記具修建原委且於幾暇手書付鈐表示鄭重

建修

將以明年仲春詣學釋奠落成之彰盛典焉遐稽闕里廟堂有後漢時犧象諸尊以為觀美爰擇內府所藏周范銅鼎尊卣壘壺簠簋爵洗各一頒置太學陳之

大成殿中用備禮器夫

孔子志在從周楹間列姬朝法物於義惟允所司其敬凜將事典守勿替以克副朕意

四十八年

高宗純皇帝以

先師廟燎爐逼近碑亭

建修

諭工部著改造燎屋一座廣七尺五寸縱五尺三寸檐高六尺二寸址砌青砂石柱棟題椽甍瓦均用綠色琉璃

道光二年太常寺奏請修葺

先師廟殿廡

詔從之

謹案凡

先師廟工程由太常寺及國子監奏

聞者或交內務府或交工部

命下之日發帑興修至每年丁祭先時整飭止由國

子監於祀前一月移太常寺經理

附

元

至元四年作都城畫地宮城之東為廟學基

樓雪

集

謹案時遷都北城營立廟學廷議紛雜功用弗

成

二十四年設國子監命立

孔子廟吳文正公集

謹案元史成宗紀云大德十年正月營國子學於

文宣王廟西據此則立廟應在建學之先然是時特設官以立教而未有定所故雖有立廟之命而規模亦未具也

元貞元年詔立

先聖廟久未集雪樓集

大德六年建

文宣王廟於京師元史成宗紀

十年

廟成營國子監於西偏同上

至正十六年命修葺

孔子廟宇續文獻通考

明

永樂初建廟於太學之東明史禮志

謹案永樂九年廟成至十八年乃遷都

宣德四年修北京國子監

大成殿前兩廡明宣宗實錄

正統八年修國子監

先師廟明太學志

謹案孫承澤學典正統元年李賢請以佛寺之費修舉太學從之明史英宗紀正統九年新建太學成釋奠於

孔子蓋是役創議於元年下詔於八年工成於九年也

宏治十四年詔

文廟櫺星門外修屏牆以蔽之同上

謹案時謝鐸言櫺星門外有小巷橫溝積穢宜高築屏牆以為障蔽乃買地東西廣七丈五尺深四丈築屏牆上覆青色琉璃瓦兩旁築小紅牆覆以甃瓦護以欄

嘉靖九年改稱

大成殿為

先師廟

大成門為廟門

明史禮志

謹案時張璉緣帝意言

先聖祠宇宜稱廟不稱殿下諸臣議乃改稱廟并易

去大成之名

萬曆二十八年

文廟易以琉璃瓦

春明夢餘錄

謹案兩京

孔子廟皆用青瓦至是從傅新德請始易以琉璃瓦

云

